

## Pliotkerka

Esu Daukšātē Diana, ūkininku iš Medingienu duktie. Tū, kor vēsi sāka, kad tor dēdeli ūki i bistrē tvarkuos. Poiki žmuonis tei mona tiva. Na pijuokā, na latrā, darbininka. Sāka, ka aš vēsa i tievus atsigimiau. Tik mona mama mislēi kitēp. Ana monēm vadēn kaima pliotkerka, katra viskon žēna, viskon māta. Nu bet kap gali nažinuoti je pondēivs davē ausis išgērsti, i geras smegenēnis prisiminti. O, ba tuo, juk toru akis, ta kāp namatīsu? O da pridiekēt grētas kuojis, ta viskon suprasat.

Žinuokit monēi vēsa laika tēp nutink, kad būnu tēn, kor kas nuors vīkst. Kad i preita sekmaidieni. Muoviau per kaima, i krautuvi baronku nusipērkti. Tēik lēkiau, tēik biegau, ka net uždusau. Prisiedau unt soulali pri bažnīčias atsipūsti. O švintuoriou trīs muotriškas rukavuos. Vēina ta, kor visaduos so pēlka koskeli – a veselē, a pakasīnas, vēs pēlka i pēlka. Untruoji, kor tor prašmatnius karuolius, vienintelius kaimi. O trečiuoji – raišuoji. Nu i pasakīkit, ar aš pliuotkiju? Juk ni vēina varda napaminiejau. Ta kāp gal sakīti, kad aš pliuotkiju? U, ba tuo, žinuokit na spicelē klausiaus. Aš tik ilsiejaus. U ta pilkuoji tēik garsē šaukē, ka i korts girdietu.

Bidavuoji ana, ka sūnou naspie lēipžēidīnis vērti, vāks kāp kuosei tep kuosei. Paklaustu monēs, aš vēsa teisībi pasakīčiau. Tagu mažiau tabuokas trauk už krautuvēs kompa, ta nakuosīs. Raišuoji ērgi pridūri, ka anuos vāks nieka navalga. Benē serg. Rēks pas daktarus vežti. Paklaustu monēs, tēkra vēsa teisībi pasakīčiau. Tagu mažiau krautuvie saldiušku perk, ta dvijās šaukštās viskon kimš. Trečiuoji vakū naturieji, ta kitū bidū prisimēslēja. Saka kars būs, nes varnas pulkās api bažnīčia ratus sok.

Na tik būs, bet i kaimi pri prūda katinā dēl kikvēinuos ploskēs pešas. U susiedu gaidē dēl kēkveina slēika kapuojas. Da prisided žvērbliu peštīnis, vakū grumtīnis. O kaimali buobu nieks napralēns. Ta vēinam gali šauk, ta kitam klīk. Narek ni didesniu karū.

Galiečiau šērdi nuraminti. Tikra. Mon gaila. Bat anuos napamislēi monis paklausti. O pati nasakīsu, nes žinuot kou išvadins. O kam mon tuo rēk?